

大兵奄至其營。令陳寅攻山寨。寅身先士卒。冒彈矢。勇呼而上。斫柵兩重。清正白袍躍馬。督倭拒守。其第三重柵垂拔。楊鎬密令茅國器竊割倭級。國器以李如梅未至。不便首功。遂鳴金罷戰。詰朝如梅至。攻之不拔。朝鮮臣李德馨訛報海上倭船揚帆而來。鎬不及下令。策馬西奔。諸軍遂潰。清正縱衆逐北。我兵死者萬餘。遊擊盧繼忠三千人殲焉。鎬潰奔星州。撤兵還王京。會同玠露布言蔚山大捷。諸營上簿書。士卒亡者二萬餘。鎬大怒。駁改。止稱百十人。丁應泰聞蔚

山之敗。慚惋詣鎬。問後計。鎬示以張位沈一貫手書。并所票未下旨。揚揚功伐。應泰怒。驗進退實情。首論位一貫。交結邊臣。扶同欺蔽。鎬附勢煽禍。飾敗張功。及麻貴。李如梅。按律悉當斬。并鎬駁改陣亡兵馬卷冊封上。上覽奏震怒。欲付之法。內閣志暉趙力救得允。鎬聽勘部推候慶遠。查勘東征軍務。上不允。用給事徐觀瀾。上怒。內閣位密揭薦鎬朋欺憤事。劾籍去。是時主事丁應泰獲朝鮮臣申叔舟海東紀略冊。見其紀年大書日本偽朔。而書永樂宣德正朔。

于偽朔之下。應泰上其書。又聞朝鮮求地于玠。玠許之。具題以寬奠夾江洲地界于應泰。上疏摘發李昞奸狀。有旨并勘。勘臣將至玠。急令麻貴趨清正。董一元趨正成。劉綖趨行長。陳璘水路趨海。劉綖兵逼行長營。使吳宗道約行長爲好會。行長許以五十人往。綖大喜。分布諸將。四面設伏。令健卒詐爲綖而。綖詐爲卒。執壺觴侍。令軍中曰。視吾出帳。卽放砲圍倭。衆亂斫之。翌晨。行長果從五十騎來。偽綖磬折迎于帳外。及席。行長顧執壺觴者曰。此人有福氣者。綖驚

愕。置壺觴而出。司旗鼓者驟傳砲。伏兵盡起。行長騰躍上馬。從騎一字雁列。風剪電掣。旋轉格殺。遊擊王之翰率黔苗兵來援。倭始奪路而去。明日遣人謝宴。綖亦遣官謝。謂登席放砲敬客禮也。誤生疑心。行長唯唯。遣使綖巾幗。綖進攻城。行長潛出千餘騎扼之。綖敗北。喪士卒千餘。陳璘亦棄軍遁。覆舟溺死者萬餘。綖璘互相訐揭。玠槩不以聞。麻貴至蔚山。望之空壘。及趨而至。忽然旗幟蔽空。貴策馬而逃。喪兵十千。董一元使茅國器約正成完封局。正成陽聽之。奄殺

我兵殆盡。僵屍四十里。勘科徐觀瀾聞報。大罵諸奸。叅奏四路喪敗。旨下部再勘。詔斬馬呈文郝三。聘以徇一元等各帶罪立功。初上見丁應泰疏。謂御極二十六年。未見忠直如此人者。書其名于御屏。一貫懼賄。玉熙宮宦官知文溪演東征戲文。熒惑聖覽。乃霽威。復召一貫入閣。而台省急攻志臯。註籍不出。倭將各統兵歸國。時平秀吉已于七月九日死。諸酋久有歸志。玠斂軍中數萬金賄諸酋。隨之渡海。求秀吉之子。永結和好。諸酋欣然揚帆。同日南去。經

理萬世德。自六月受命。遷延不敢前。比聞倭退。兼程馳至王京。會同邢玠奏捷。遣三百人分送三酋。亦遣百人送玠。渡鴨綠江。玠卽縛之以獻。俘云主事丁應泰。再疏玠等遣茅國科假官齎賄。隨倭渡海。並無戰功。僞奏膚捷。一切奸狀。而給事劉餘澤陳如吉劾其妬有功者得。旨罷應泰。勘科徐觀瀾亦抗疏。叅一貫大亨玠世德。四克者黨和賣國。疏至長安。侍郎張養蒙尼之不得上。時觀瀾方駐遼。身歷釜山蔚山忠州星州南原稷山。查劾各處敗狀。據實入冊。大

亨危之。通于一貫。遂簡觀瀾前疏中。有抱病語。准賜骸骨歸。改差給事楊應文。代完勘事。應文盛稱玠鴻伐。而中外莫敢有言者矣。二十七年。吏科陳維春劾奏贊畫主事丁應泰。神奸黨倭賣國。薊遼總督邢玠。奏稱監軍御史陳效。爲丁應泰所逼。身死異域。初效同徐給事會勘。自誓曰。效若庇同年楊鎬。則不生還。後竟食言。及應泰疏出。乃曰。吾爲羣醜所誤。官何足論。奈不諱于名簡。何無奈張內閣書。吾悔無及矣。至南原。又曰。夢陣亡諸鬼索食。吾其殆乎。萬世德對

坐舉茶遽僕。頃刻死。給事中楊應文。勘報東征功次。四路擒斬。如邢玠所奏。玠廕錦衣世官。世德廕子入監。綆璘貴各升級。一元復職。鎬以原官敘用。陳效亦廕子錦衣。沈惟敬棄市。始撤朝鮮戍兵。先是玠世德與朝鮮王李昫議。畱兵善後。昫固拒不從。曰。不戰而去。何必善後。小邦無糧。不敢畱兵。監軍陳效怒曰。不畱兵。豈成戰局。因強畱兵萬五千。朝鮮不肯給餉。戶尚書陳渠謂七八年來。所費本色百萬。折色四百萬。必朝鮮辦餉。方可議戍。署兵尚書蕭大亨。心知朝鮮

苦此集成。遂議撤之。福建巡按方元彥奏初紅夷之入閩。不過二船。貪漢財物爲奸商所誘而來。久之賈人欺給。盡沒其貲。夷爲無告。守土大吏不辦。侏儻之言。惟憑通事顛倒。以致夷人忿而稱亂。自後時時見告。不可復止。二十九年。吏科曹于汴劾奏。尚書邢玠。經略播州。苟且卒事。以致禍結兵連。戕民耗國。經略朝鮮。掩敗支吾。旣稱倭將義弘斬級矣。倭將正成生擒矣。義弘正成見在無恙。復以書來。申明和約。則當時死于兵戮于西市者何人也。此古今未有不欺慕。

士金相嘆其以無辜講和之夷。誘之爲俘。驅之就死。不勝憤。削髮辭去。不大愧玠哉。姑息優容。四千金偵伺之說。又見于兵垣合糾。是益之愆也。三十年。倭王平義智還其所擄于朝鮮。朝鮮王李昞安置倭使。楮智正于絕影島。告急于我。乞得水。上名將爲賊所畏。憚者。于是趙楫上其事。而給事桂有根。洪瞻祖。孫善斷。皆策之。亟有旨。撰勅申誠朝鮮。勿以懦。緩解免。鎮江旅順各嚴之。三十五年。朝鮮國王李昞。以倭情見報。曰倭家康已傳國政。盡反。秀吉所爲。自庚子迄。

丙午。屢使訂盟。發回所擄人口。遣僧松雲往訶之。秀

忠家康之子似致恭順。大司馬蕭文亨奏其事。戶尙書趙

世卿奏閩撫徐學聚之効。稅監高宥也。利盡山海。布

滿諸洋。日本暹羅呂宋和蘭大泥占城。艤艫相接。歐

思等住石馬林。宗文等住中左海口。如織復勾紅夷

等番。許其通貢。侵入南灣。殺戮商漁無算。塗炭至此。

追其亂萌。晚矣。三十六年八月。琉球通事郭國安具

密狀曰。日本摩薩州。世習強兵。今春遣花山權左衛

門率衆三千。取琉球國。二月廿六日。連破孤山。中山

王降。遷其宗器。及其弟叔三法司五百餘人。載歸摩

薩。九月。差十酋長往琉球。丈田起賊。其意挾琉球以

通閩浙也。閩撫陳子貞上其事。三十七年。倭玄蘇平

景直等。賫其國書。載船泊朝鮮之對馬島。假道修貢。

遼撫李炳上其事。九月。琉球差鄭俊梁順。告急于中

國。則其王妃所遣也。三十八年九月。倭假琉球修貢。

長史蔡堅。通事林世重。入京以窺之。三十九年。浙江

巡撫高舉。奏台溫兩逼之交者。三盤也。宜一哨。台之

大陳。一哨溫之東浴。嘉兩逼之交者。莆巖也。宜一哨

寧之陳錢。一哨嘉之洋山。設有遊擊將軍。重其控制。薦成啓元梁文領之。四十年五月。朝廷回賜勅書。王舅毛鳳儀賫之于摩薩州。州主給米百五十包。仍護送之于倭京。閩撫丁繼嗣飭汛議曰。台嶺二遊之守松山。爲北戶也。三江口爲興化之門庭。守要于劉灣與苦嶼。萬安等哨。甚近海澄。機兵舊係土著。今以浙易土。稍厚其餉。免鬻弊矣。四十一年。粵師王鳴鶴。倭借對馬島互市。爲入朝鮮之梯。以爲中國能救朝鮮。不能救琉球也。今乘其弱。據雞籠淡水。借其

貢道。爲入中國之梯。臣昔勦寧征播。並策北虜。四十二年。朝鮮王李昖以倭情來告曰。平義智差賫書契。要求貢路。詞設悖慢。或屬關白之謀。每以琉球被滅。爲張詡。此不足憑較。曩奉兵部咨。許本國便宜。從巧開市。金山。超海之船舶。畱浦之日月。坐艖之人數。邇平屢乞增船。親詣王京。顯示陵逼。謹陳機務。以洞其信然之志。四十三年。浙撫劉一焜。巡按李邦誨。會奏普陀之望。日本風帆三日可到。寺建自宋元豐。方國珍據之爲亂。洪武乙丑。信國公和燔其宮。移像于郡。

城角東棲心寺。天順後。奸僧日煩。嘉靖間。倭據普陀。流毒億萬。事平有旨。移寺于縣之招寶山。僧徒潛住者充軍。今萬曆壬寅奉聖母重建。標下一遊。定海一哨。若復興造。防守更難。伏惟裁察。不報。十月。粵督張鳴岡奏。粵海旦夕。以濠鏡澳夷爲兢兢。多蓄倭奴。以爲羽翼。臣令道臣喻安性。香山縣令但啓元。躬視濠中。宣上威德。獻出倭夷一百二十三名。待以不殺。令歸本國。已載舟而掛帆矣。夷目咩吵啣咕啾等。立狀爲之永禁。四十四年七月。禮部奏。西洋夷麗

廸。我熊三拔。及已故利瑪竇。不知何所慕戀。遠來久處。說者謂香山縣蠓鏡澳夷之細人也。前此賈夷棲蓬。誅草于澳中。次第柴屋築城。招倭奴紅毛番海鬼。竊據其地。習華語。讀華書。衆庶旣利其賕賄。士人亦墮其雲霧。今如豐陽瑪諾等。大煽夷教于洪武岡。非我族類。實逼處此。令甲于外夷。必核印表。重譯而後敢入。豈有不經路引。根株深固。識者抱郭欽江統之憂。請亟罷遣侍郎沈權。御史朱楷。皆論之。報可。八月。御史陳玉輝以閩人策閩事。曰。倭有吞併雞籠之心。

必有協取淡水之曰。有挾要互市之謀。必有侵據彭湖之漸。夫南鹿者在閩爲頭顱。在浙爲尾閩。舊撫臣黃承玄會學曾皆籌之。宜置水兵杜其艘路。而尤致謹于澎湖。決勝千里云。三月山東巡按王雅量奏。登萊三歲告稜。民枯于涸轍。往例有行之者。嘉靖辛酉。萬曆丁亥。兩遇天災。暫開海禁。商船百艘。任其糶糴。給引移粟。民乃起于溝瘠。有五利焉。一以集稅。一以勾補。一以邊需。一以防倭。一以禦虜。蓋與遼左爲表裏也。四十五年二月。應天府王應麟條防海事。向者

李家洪一沙未洗。險在吳淞。嘉隆來吳淞漸淤。非潮洑不通舟楫。而李家洪北接大洋。南連黃浦。險已移之寶山。昔時一堡海標焉。今移把總鎮之。而遊陸二營。仍隨總兵駐淞。與寶山峙者。有稗草沙。則輪其兩哨。青村南匯二營。各六百人。畫地而戍。其三唬船民兵。已汰。循塘拒守。宜增三十六兵。專駕免于抽調。金山衛沙船十五。唬船六。宜復其二十人。勿汰。蘇松海洋奇兵營沙船八。唬船五。宜責成于爛沙頭。分其信地。楊舍一營。不應泥于谷瀆。而應獨脩平寧一沙。民

間沙船多有力者。堅大能破巨浪。有議其爲患。折之者。民失其資。必挺而走險矣。編號立甲。刻字給由。泊于沿江有事。得其所用。部議悉允。五月總督周加謨。巡按田生金。籌粵事者。內海屬之驛傳。外海屬之海道。似岐權也。陸兵仍巡道。而內外海惟海道所驅。汎汎期參差。非制也。應先汎十日出。移附海城。而大帥駐虎頭門。以防其僨。水軍之命在舟。水戰之命在火。器料價窳薄。則士力殫。宜酌增之。溥夷龐迪我。論令西歸矣。其羣夷去故土數萬里。居溥中六十年。殲之。

干和逐之難脫。莫若謹香山一關。嚴奸人之嚮道耳。四十六年。閩撫黃承玄曰。清明後爲大汎。夏至則止。霜降後爲小汎。冬至則止。今則不然。自琉球告警。以後。東湧以汎後至。料羅以汎前至。大金以殘臘至。島燧未敢撤防也。料羅絕島。九月颶作。倭一舟百餘人。取水澄岸。彈人焚廬。浯嶼把總楊裔。厥罪宜褫。而王仕忠犁其舟于中流。大金者十二月倭來。南麂屏風山劫商船。泊烽火門。我兵逐之。一倭落水。戴元勳釣之舟中。倭以三舟追于礪山。會楊希忠船觸礁而碎。

倭及大金。我兵遂棄而走。倭焚城內三百舍。殺傷五十餘人。由雞籠東而去。福寧叅將劉思祖把總陳加訓。厥罪宜褫。海防同知鄧全悌。知州殷之輅。坐罰俸。俱得允。四月廿二日。有倭船突五瓜湖。遊擊黃承爵禦之。廿四日。倭船突窩兒灣。叅將張可大禦之。又倭船突海松。把總胡獻琛禦之。收其草撒船而還。廿七日。倭船突台逼。把總羅奎章禦之。廿八日。倭船突壇頭。昌國把總王施仁禦之。五月初二日。倭船突漁山。叅將俞咨臯禦之。接日五船。斬倭十級。餘悉燬溺。巡

撫劉一焜以捷聞。八月東撫李長庚從海道陶朗先之請也。奴治船于烏龍江。雖不舍騎而波臣是問。我焉可以乏備。登調援拔銳矣。亟募六百人補之。四十八年八月。登撫陶朗先奏。島將王紹勳往撫寬奠。寬奠民莫不踴躍。歃血而奴攻東山。乘勝下寬奠。力已不敵。奔入夾江。投朝鮮以苟存。宜令水戎沈有容嚴正中爲之助。亟遣紹勳聯絡朝鮮。亦所以防其間也。天啓元年七月。都司毛文龍從廣寧渡兵二百爲風所飄于鎮江。十四日泊鹿島。十八日歷朝鮮彌串堡。

十九日謀知佟養貞抄殺黃嘴商山蘇其民張攀等
遂乘其虛夜入鎮江以陳良策王一寧先入爲應乃
擒佟養貞等六十餘賊遼撫王化貞奏其捷有旨
鎮江擒叛四衛響應化貞指授有方津撫畢自嚴登
撫陶朗先速從海策於是部議以梁之垣奉勅而
諭高麗之垣請備餉二十萬甲士二千人以從經略
熊廷弼曰鎮江已復義州有王紹勳等之兵足矣三
部侍郎王在晉條上十議曰奇捷者轉喜爲懼時也
兵孤援誦云爾御史方震孺曰毛文龍卽未能創奴

而能勞奴僊奴亦一奇也光祿岳元聲奏曰鎮江初
捷之時則爲倖得倖失之文龍鎮江旣屠之後則爲
若存若亡之文龍皮島未營之先則爲可畱可去之
文龍皮島旣營之後則爲千慮萬慮之文龍則國臂
之輕擲帥尾之孤搖也廿七日奴遣萬騎盡屠鎮江
以劉愛塔爲三衛帥毛文龍逃入朝鮮避之伏州單
遊擊收聚遼人五六萬赴長山島李應坤督船四十
三艘接遼入于鹿島二年正月十二日御史賈毓祥
曰散兵諸島扼要旅順萬全之道也經臣疑臣于附

和臣則何敢。四月御史李時榮曰。山東驟增軍兵。穀價騰踴。陶朗先出海之師萬人。劉國縉集遼三千。最驕橫而難制。淮揚募兵七千爲最。何以建復遼之策。御史董羽宸曰。登萊蕞爾。一旦客戍遼民。幾數十萬。賤農而貴兵。賤土著而貴烏合。賤約束而貴作奸犯科。登萊之人。無所措其手足矣。新撫袁可立曰。勿虞。奴且患內變將作。敗形亂道。皇皇也。九月初二日。毛文龍又報董骨寨閻王寨之捷。陳繼盛等舍水而陸。得級一百二十八。十一月浙撫蘇茂相以勦寇報曰。

把總唐欽中。黎延慶。捕賊于海門金盤門。陳拱揚。懋忠等。善駕小艚。焚其大鯨。斬捕二十餘級。得生口者百八人。僞稱長岐島王。沉船橫槩。路將陳希范之力也。十二月廿二日。御史夏之令奏曰。夫三韓旣失。茫茫大海。我與彼共之。我航朝鮮甚險遠。彼趨登萊甚近。易建州真夷。信不慣乘舟。彼若使南四衛人。及江浙人之爲彼用者。千艘直指山東。徐勾連西虜。以大眾逼山海關。顧不得爾耶。竊謂登萊宜急設重兵也。毛文龍駐朝鮮。則我自不能接應。而登萊已危。我未

能用文龍制奴。而奴先用文龍誤我。竊謂文龍宜撤回也。文龍不惟不能牽奴。且多裨益奴。何也。驅有用之兵將。翱翔于若順若逆之邦。櫛風沐雨。蒙犯霜露。遷延既久。疾疫將生。中國猝有事而不能召。海道猝有梗而不能歸。朝鮮一旦閉其糴。絕其樵汲。而數萬人可立斃也。客其館。食其粟。衣其布帛。淫其子女。歲月因仍。嫌怨易起。言語往復。仇恨日深。因以傷小國之心。而堅其擇強之計。奸細假接應爲名。方舟並濟。略無難阻。白衣搖櫓。潛兵暗渡。尙欲導之。由廟灣搗

淮揚。由永平海。以襲天津者。三方布置。熊廷弼之迂談也。悠悠海濱。無風詐稱有風。無寇捏稱有寇。誰肯同心踴躍前往。文龍之不能害奴。亦自知之審矣。奴非畏文龍。實畏二千人絆之。敢正視鎮江哉。其未卽來。則城郭宮室未完也。奸細之來關內者。未盡得當以報也。我方以百萬餌西虜。彼欲構之。非倍此不可。計西虜固挾彼要我。亦挾我要彼。約言未定。姑爲躊蹰也。文龍在朝鮮幾二年。零級續報舉。朝動色。皆奴首之所掩口竊笑者也。佟養貞父子二鼠耳。于彼

國有何關係。賀世賢之一百四十級。不宜傳四夷乎。而今何如耶。之令卒以此疏得禍。島帥毛文龍上方略陳大韶守旅順。三山島距廣島二百里。王學易居之。入金州。廣鹿東距長山五十里。宋鵬舉居之。入伏州。長山東距石城三百里。劉可紳居之。入海州。石城近小松島。林茂春居之。入蓋州。石城距鹿島二百里。程倣居之。入守岫巖。鹿島距朝鮮寬靛二百里。張思孔張繼善尤景和。乘除其間。直入奴寨。三年八月。沈有容毛文龍三報互異。登撫表可立奏疑事。曰一金

州也。在有容。謂奴緣劉愛塔。約降事洩。遍戮金民。空之而去。在之龍。謂張盤火攻砲擊。逐夷而收金城。一愛塔也。在文龍。則咎洩于登營。在有容。則咎洩于陳營。至于滿浦昌城等捷。賈志祥所報者。用兵不滿一千。未交一戰。不遺一鏃。而使賊自相蹂踐。及被砲者。二萬有餘。坐收全勝。骨董閻寨斬二百三十級。千古未有之奇矣。居無何。文龍報涼馬個之捷。分從六路。清河小孤。鬣陽。洒馬橫江。折木。勝算無比。殲級二千有奇。有容亦遣舟師泊復州。焚奴積聚。詔嘉之。截漕十萬。賞金三

萬給之。嗚呼。三報互異。不可詰也。四年五月登撫袁可立。奏職于海上諸島。向頗畱心咨訪。其與登鎮相對者。旅順也。東則平島。三山。廣鹿諸島在焉。他島但可往來停泊。而島口寬闊。可以駐船屯兵者。惟廣鹿長山。懸在海中。距老岸六七十里。如欲應援毛帥。則二島爲緊。若議進窺遼陽。覺此島爲緩地矣。旅順以西。其近峙者。有半須凹山。連老岸。不可泊舟。再西則爲雙島環島。皆山。駐舟雖不虞風颺。但薪水皆取給老岸。恐未便也。轉而西北。則有麻洋島。再北則有林

木。汜悶島。皆狹而水淺。不堪屯駐。再北則中島。南汎北汎口也。三島皆四面環海。其去老岸。遠者六七里。近者三四里。陸路抵伏州三十里。蓋州一百八十里。水路抵蓋州。祇半日程。東南風順。抵三岔覺華島。一日程。再如由蓋套入蓋州。不過十里。由三岔河入海州。不過四十里。由海州入遼陽。僅一百二十里。比督師閣臣謂三島之間。可進窺伏。蓋西聯覺華。良有見耳。且三島沃野百里。甘泉茂林。卽充國之金城。不是過之。欲藉登兵以議恢復。則三島爲屯住要地。海外

諸島之形勢大略如此。今欲分地。則旅順以東各島。毛師業已布兵屯住。且逼近金州。頃兵部議金州當爲毛師進兵發軔之地。此自當屬之東鎮。若旅順以西。則去皮島最遠。恐東鎮之鞭雖長。終難以及。馬腹也。九月閩撫商周祚。以爲紅夷突犯漳州之陸鰲。而銅山卒卒援之不及。遂被焚掠。巡道程再伊。叅將張嘉策。把總劉英禦之去。十月夷舟復入中左所。總兵徐一鳴。海道高登龍。遊擊趙頗。告急。此用武之秋也。張嘉策請勿他擢。居有頃。御史崔奇觀。劾奏程再伊。

通夷有據。受賄已彰。得旨下部看議之。未幾紅夷目高文律。籍通事洪慶宇。爲好言。獻其大銃二門。小銃五門。爲質。求互市。願徙大舟還本海。周祚遣方輿督之。必墮彭湖城。始准復咬嚼吧之市。萬曆甲辰。奸民潘秀勾大泥國咬嚼吧來彭湖者。隸琉球。山川非中國版圖。而實南閩門戶。爾時守土者議拒回。已得旨而稅璫高家戀賄主之。中間販海者。乃又利呂宋貿易不貲。遂斷彭湖。久之紅夷怨憤。故入內地。互相殺傷。且失利。亦蕭然逝波矣。蓋誘文律至教場。大

陳兵衛。而且釋捐。議復海禁。所以南山仔不必泊。倭不必還。呂宋不必革。而紅夷晏如。二月廿五日。毛文龍深入搗巢。斬虜三百七十一級。又于去冬十一月。攻烏雞關。進搗斬虜二百二十五級。於是登撫袁可立。內閣督師承宗報聞有旨。賞以帑金三萬。錫文龍蟒衣一襲。白金百兩。褒焉。閩撫南居益條上紅夷事。去夏之犯料羅古雷也。自葦麻郎始于今矣。新牛文來律十三艘。載夷二千。真倭二百人。海道孫國禎副帥俞咨臯。遊擊劉應龍等。率舟師百有七帆。移于

員背嶼。臣奉旂牌督之。南則蒔上抵風櫃。中則直抵案上仔。北則暗灣抵媽宮。向銃城用火攻策。斷其樵汲。既已據險設強。相持三閱月。夷乃豎白旗。俛通事黃應魁。願拆城圮墻。以完市。焚其舟十三。壓壘而墮其巢。而往年。中左米翦之勳。收全于鯨浪矣。九月。毛文龍續報涼馬佃之捷。牛馬之捷。牛毛之捷。獻俘活夷十二名。夷婦五口。首級七百二十六顆。有旨告廟。御史袁化中奏。豹敗五人。獐猙似真夷者。把括粘着等。幼童女八人。縲如貫螺。聲如羣鴉。在我未常

有斬將奪城之勳。在奴未聞有沒軍喪師之辱。當名
王梟叛之首。充國重典。書奏不納。十一月毛文龍兵
至把骨寨。骨皮峪分水嶺。三戰三捷。斬級四百五十
俘獲生夷二十餘名。五年三月。奴破旅順。裨將張盤
死之。朱國昌駐長行島。救之。被劾。曾有功。駐三山島。
坐視奴去。扁舟入旅順。掠婦女而行。遊擊林茂春邀
之。七月。登撫武之望。規畫旅順。而深規毛文龍也。兵
部議曰。文龍艷恢復之高名。局已闕而力難副。歸怨
比隣。尾之大矣。科臣王夢尹。葉有聲。臺臣汪裕。皆總

總難之。夫以爲征伐之大兵。冒老寨襲新城。則誣矣。
以爲牽制之遊兵。練舟師。熟海道。則不爲多矣。以爲
撫護難民。招致降民。勿爲奴用。則不可少矣。張盤原
屬倖功。張板止堪哨駐。其南關之築。姑停之。勿侈也。
卒城于旅順。十二月。兵部議曰。牽制奴酋者。朝鮮也。
聯絡朝鮮者。毛鎮也。駕馭毛鎮者。登撫也。今日詬誶
之事起。以小不忍。成大不和。撫與鎮隙。鎮與屬國隙。
使敵乘便而抵之。熾。先是李綜之無國而有國也。
李綜廢其主李暉。以太妃令請封號。文龍與有力焉。樵蘇之逼。餼牽之資。

米價之不償。營室之無虞。鮮乃携二千島矣。尹義立韓潤淵輩之叛也。彼國處分之足矣。登撫武之望。不滿文龍所爲。故有是議。六年三月。奴方寇寧遠。而毛文龍報八會寨之捷。登撫李嵩駁之。有旨。奴犯寧遠。已經三月。毛文龍竟不覺知。何云牽制。因勅兵部。毛文龍遠駐東江。二千里不相救。其酌駐處要害。以便策應焉。五月。毛文龍報曰。臣所駐須彌島。連有三山。周圍廣闊。二百餘里。中則雲從山。前則須彌島。後真珠島。以陸程計。雲從之離鐵山。有八十里。以水

程計。鐵山之至雲從。僅二十里。雲從與須彌。從大路去。至義州。止一百六十里。鐵山從水路去。亦如之。義州與鎮江相對。不過有二四里。鎮江至遼陽。三百六十里。是鐵山與須彌與奴寨總之相距。在五百里內。今謂去奴二千餘里。政不知何臣作此誑言。以欺皇上。今日便議移鎮。此何見也。有旨仍之。六月。毛文龍報會安堡之捷。接回順民千有三百人。擒真夷三十六名。工科王夢尹使于朝鮮。以情形上言。遼民者。近十萬。枵腹不任戈。遼兵者。堪戰二三萬。卒無甲

械。遼官者各衛避難東江。流離孰甚。遼生者患難中。不廢誦讀。忍錮之于海。商人者銀給于島。商窘于登。欠至九十餘萬矣。俘解者。旅順迨鐵山。遇之擾其耕牧也。屯田者。獐島西隸遼。皮島西隸鮮。已得二十九萬石。接濟者。文龍以帑易貨。以貨易米。屬國亦苦之。于是文龍奏立島學以訓士。詔允之。七年正月。奴假麗人裝數萬。捨鐵山而計擒毛文龍。文龍潛雲從山。而用間伏于皮島。大擊敗奴。奴恨之。盡殺麗人六萬。焚糧而去。袁崇煥發水兵援之。詔曰。設撫可陽。

言者以慰朕懷。其近于陰者。以聽該撫。于是朝鮮告急于遼。遂遣汪翥徐勇。舟師二十艘。而趙率教等移駐大雙松吉之間。更選覺華島三千以益之。三月。島中叛將毛永顯高萬重。劉章李鏞等。掠婦女財帛。登舟而駛。文龍率毛承祿救宣州。襲殺奴于義州。晏延關。二月。海賊鄭芝龍犯銅山。把總茅宗憲莫能禦。焚及民舍。已又犯中左。叅將陳希范金富廉拒之而退。四月。復犯銅。我燒其一艘。賊順風勝之。又犯中左海。道周應期。陳兵。賊不得入。復犯泉南。燒我樓船十隻。

巡撫朱一馮以聞海賊楊六等就撫。賚敘之。職方氏論曰。中國有聖人興。澄清萬方。宣化三譯。大矣哉。海不揚波。二百有六十年。獨其間莫神于望海。塢之捷。莫毒于嘉靖之蔓延。莫誕于島帥之牽制。夫漢通甌越。而樓船贖爲庶人。唐征麗遼。而黃銀難填。巨浪海不亂華。華自驚海而罔華耳。是以高廟勒垂祖訓。世世備虜爲內憂。而釋倭爲外懼。長陵中使遠泛西洋。固有別說。自非然者。珠崖未棄。合浦無還。市舶之開閉。莫塞其源。漁禁之往歸。或逋其藪。深

山大澤之龍蛇。不在外府也。官海者。病以海爲壑。治海之寇者。病以隣國爲壑。廣之交。閩之交。越之交。吳。吳之交。齊。齊之交。遼。細大不相關。掌股不互運。如是而海病矣。夫寇之利海。以其舟堅。我之不利寇。以其舟瑕。寇無舟。取諸賈客。雖堅而小。我有舟。取諸官帑。雖瑕而大。大而不瑕。與波上下。無全敵矣。汛之制。五歲大修。二歲小修。營牒請兵使者。使者牒請制院。院檄方伯稽實之。左右轉動。積微耗著。價數且廉。給發短計。汛卒各捐糧以佐費。此瑕之本也。千夫長

百夫長。謀日不足。誰爲永圖。木頭竹屑之不充。弗敢
破浪擊賊。臨風多觸礁。報飄無虛時。復科斂而更新。
此瑕之用也。昔者劉宴轉漕。每估多值。其究市利三
倍。領漕之卒。家致殷陳。公家竟賴舳舻之益。代者措
其羨。改爲操切。無不家毀。漕艘遂廢。則思過半矣。故
汎價宜厚。賈值宜預。覈造宜真。使卒輕舟。舟輕器器
輕風。而寇在掌中矣。夫戎舟有地利。因之則治。廣船
便裏海。福蒼船便外洋。浙唬船便島嶼之間。吳沙船
便灘洲之察。易水而駕。未有不膠而覆者也。登萊諸

島礁石

測驗之風針。不嫻于倭。以故山東未罹倭

患。而虜伸騎屈舟。卽帆潮接旅順。虜將焉之。天啓初。

毛文龍因鎮江之小批。開三島之大幕。東江一片地。

儼然夜郎尉佗。履至險而乘至安。露布時聞。奧援三

錫。飛輓不貲。卒之牽制。罔效。夫設官登萊。恢復四

州。金復海蓋計畫似奇。施用終曳。事不師古。而望赤蜃之

宮。飲黃龍之府。我未之前聞也。朝有盜臣。野有盜兵。

諦觀倭變。登壇推轂者。趙文華。鼇冠加劔者。朱統張。

經。彭天寵也。相倚屣四方。決踵銷骨。鑠金盜賊滋起。

其是之嘆歟。



臺灣國家圖書館, NATIONAL CENTRAL LIBRARY, TAIWAN, R.O.C.

全邊略記卷之十

遼東略

山海關在內

桐城方孔炤潛夫父輯

洪武元年我

高皇帝之伐中原也。式於廟堂。首逐元都。驅及上都。北平大定。而王保保恃其黠。爲頑。大將軍達等直取太原。不逾秋。北邊全底於績。其於遼東西。猶所緩。洪武三年春。故元遼陽行省平章劉益。藉其軍馬錢糧之數。奔遼東州郡地圖。遣使奉表求降。上嘉其誠。遣

斷事吳立持。詔往諭。置遼東指揮使司。以益同知指揮事。四年劉益既降。授官未幾。故元平章供保保馬彥翬共謀殺益。其右丞張良佐。房高擒彥翬殺之。保保走。故元將唵哈出營遼東之衆。因推良佐等權衛事。良佐遣使械送殺益逆黨平章八丹。知院僧兒等至京。且言肘腋之間。皆爲敵境。乞留。朝廷所遣斷事吳立撫之。上以立與良佐高俱爲遼東指揮。既而唵哈出據金山。擾邊爲患。本衛乞益兵。及遣黃禱。以書諭唵哈。出被拘不還。於是大爲保疆計。乃置

都衛。以馬雲葉興旺爲都指揮。摠轄遼東。時遼反。側尚多雲等繇登萊渡海。頓兵金州。招降故元叅政葉廷秀。敗走平章高家奴。遂進至遼東。完城繕兵。設守備。一方遂安。五年戊辰。東命靖海侯禎_吳摠舟師。繇登萊轉運之。九年十二月。納哈出來寇。雲旺偵知其將至。命蓋州指揮吳立等。堅壁勿與戰。納哈出至徑。趨金州。城池未完。軍士寡少。指揮王富督勵士卒。分守諸門。選精銳登城以禦之。納哈出裨將乃刺吾。自恃驍勇。率數百騎挑戰。城上發箭中之。遂獲之。虜勢

大阻納哈出慮援至引兵退走乃繇城南十里外從
幹河歸葉旺覺之先移兵梓河自連雲島至窟駝寨
十餘里沿河疊木爲牆以水淋之經宿皆凝結隱然
如城藏釘板於河中設陷馬奔於平地伏兵待之老
弱捲旗登兩山間諭以聞砲卽豎旗令指揮周鶚等
各肅兵以俟虜見寂無人形抄過城南砲發伏兵四
起兩山旗旌蔽空鼓聲震動矢石雨下虜駭倉皇北
奔趨連雲島遇冰城馬不能前皆陷遂大潰馬雲復
於城中出兵追擊至將軍山畢栗河斬戮虜人馬及

凍死者甚衆旺等乘勝追至猪兒峪獲其士馬無算
納哈出僅以身免捷聞上遣使齎勅獎勞遼東諸
將擢馬雲葉旺都督僉事十二年勅遼東守將潘敬
等曰奏至知高麗龍州鄭白等降朕未審將軍識其
計否高麗僻處海隅俗詐性頑人情莫不安土重遷
舍桑梓歸異鄉斯必示弱於我如墮其計不過三年
間至者接跡其害豈小小哉符至之日開諭來者令
還今國中方寧息兵養民爾與東夷接境慎勿妄生
小隙使彼得以藉口彼果不滅則師有名春秋有云

毋納逋逃。不然邊患繇此而起矣。士卒饋運渡海有溺死者。上聞之。命羣臣議屯田之法。諭之曰。昔遼左之地。在元爲富庶。至朕卽位之二年。元臣來歸。有勸復立遼陽行省者。朕以其地早寒。土曠人稀。不欲建置勞民。但立衛以兵戍之。其糧餉歲輸海上。每聞一夫航海。家懷訣別。事非獲已。憂在朕心。必至期復命。士卒無虞。心方釋然。近聞有溺死者。朕終夕不寐。爾等其議屯田之法。以圖長久。十六年。高麗遣使張伯崖。請來貢。以違命却之。令禮部諭王。按朝鮮秦遼

東外徼。漢初爲燕衛滿所據。武帝取爲真番。臨屯樂浪。玄菟四郡。漢末爲公孫氏所據。魏滅公孫。晉并於高麗。高麗本扶餘別種。王高璉居平壤。卽樂浪。已而東徙鴨綠江。東南千餘里。後唐時。王建代高氏。并有新羅。百濟。又徙東松嶽。以平壤爲西京。子孫遣使朝貢。宋遼金四百餘年。元至元中。兩京內屬。置東寧總管府。其國東西南濱海。北鄰女直。西北至鴨綠江。東西兩距二千里。南北四千里。分八道。統府州郡縣。俗柔謹。知文字。喜讀書。崇釋尚鬼。惡殺。戴折風巾。服大

袖衫。男女相悅爲婚。死三年始葬。飲食用俎豆。官吏
閑威儀。居皆茅茨。衣多麻苧。以田制俸。以秬醞酒。法
無苛條。刑不慘毒。山川九都神。嵩北嶽海鴨綠江爲
大產。金銀鐵水晶鹽細苧布白硃紙狼尾筆果下馬
長尾雞貂獬海豹皮八梢魚昆布秬黍榛栗人參茯苓
之屬。國朝二年卽奉表稱臣。朝貢不絕。至是以其
違約不恭。故諭責之。十七年。上謂部臣曰。近命遼
東立學校。或言邊境不必建學。夫聖人之教。猶天也。
天有風雨霜露。無所不施。聖教亦無徃不行。昔箕子

居朝鮮。施八條之約。故男遵禮義。女尚貞信。管寧居
遼東。講詩書。陳俎豆。飾威儀。明禮讓。而民化其德。曾
謂邊境之民。不可以教乎。况武臣子弟。久居邊境。鮮
聞禮教。恐漸移其性。今使之誦詩書。習禮儀。非但可
以造就其才。他日亦可資用。二十年九月。故元納哈
出降。赴京入見。上賜一品服。封爲海西侯。其所部
官屬。悉賜衣服冠帶。授以指揮千百戶。有差。俾各食
祿。不任事。分隸雲南兩廣福建各都司處之。殘元臣
孽已盡。惟納哈出尚擁衆金山。數擾邊。於是以正月

命征虜大將軍宋國公勝。左右副將軍頴。國公友德。永昌侯蓋。左右參將趙庸。王弼。胡海。郭英。統軍三十萬。往征之。納哈出聞之。棄金山。巢穴營於新秦州。去遼陽千八百里。王師旣行。臨江侯陳鏞所部與大將軍異道相失。陷虜死。六月。勝等率師踰金山。至女直右屯。納哈出部將全國公觀童來降。初。納哈出分兵爲三營。一曰榆林深處。一曰養鸞莊。一曰龍安一禿河。輜重富盛。畜牧蕃息。虜主數招之不往。及是大將軍逼之。納哈出計窮。乃刺吾因勸之降。納哈出猶豫。

未決。大將軍遣馬指揮往諭之。納哈出乃遣使至大將軍營。陽爲納款。而實覘兵勢。勝遂遣藍玉往一禿河。受其降。虜使見大將軍勝還報。納哈出聞之。乃指天噴噴曰。天不復與我有此衆矣。遂率數百騎自詣玉降。玉大喜。出酒與之飲。甚相歡。納哈出因酌酒酬與玉。玉請先之。納哈出卽飲訖。復酌以授玉。玉解衣以衣之。謂曰。請服此。而後飲。納哈出不肯服。玉亦持酒不飲。爭讓久之。納哈出取其酒澆地。顧其下嘴。語將脫去。時鄭國公常茂在坐。其麾下。有趙指揮者。

解胡語以告茂。直前縛之。納哈山大驚起欲就馬。茂拔刀砍之。傷臂不得去。都督耿忠遂以衆擁之。見勝。納哈出所部妻子將士凡十餘萬。在松花河北。聞納哈出被傷。遂驚潰。餘衆欲來追。勝遣前降將觀童往諭之。於是其衆亦降。凡四萬餘。并得其名愛馬。所部二十餘萬人。羊馬驢駝輜重。亘百餘里。納哈出有二侄不肯降。勝復遣人諭之。乃折弓矢擲於地。亦來降。勝以禮遇。納哈出復加慰諭。令耿忠與同寢食。遣使奏捷。仍奏常茂驚潰虜衆。遂班師。悉以納哈出來降。

將卒妻子及其輜重。俱南行。仍以都督濮英等將流兵三千爲殿。其驚竄之衆。聞大將軍旋師。以其降卒俱行。甚憾之。設伏邀之。英等後至。伏發。英猝爲所乘。衆寡不敵。英復馬踏。遂見執。自剖腹而死。二十四年春。都督沐春日虜人遠遁。塞外清寧。已置大寧都司。及廣寧諸衛。足以守邊。其守關士卒已命撤之。而山海關猶循故事。其七站軍士名雖守關。實廢屯田。養馬。自今一片石等關。每處止存軍士十餘人。譏察逋逃。餘悉令屯。二十六年。開元衛軍士馬名廣。上言五

事一日瀋陽廣寧義州舊皆有學。今宜復。二曰天下學校教育人才。其出於工商技藝之家者。稍涉膚淺。卽欺人傲物。管子曰。工商雜類。不預士伍。萬一任之以政。必無益於治。三曰狹鄉之民。遷於寬鄉。地有餘而民力不給。則分兵以屯之。庶民無游食之憂。兵無坐食之害。四曰兵老而家無丁者。除其籍。庶免有司勾補之勞。五曰今華夏治安。夷狄遠遁。正歸馬放牛之日。外衛軍士老死者。免補。且漸收蕃衛。移置京畿。上擇其可者行之。八年三月。停造遼王宮室。勅

武定侯郭英曰。遼東軍務物情。來者多言其艱苦。况邊境營繕。不宜盡力以困之。今役作軍士。皆強悍勇力善戰之人。勞苦過多。心必懷叛。徃徃逃伏草野山澤間。乘間劫掠。近者高麗表奏。言多不實。朕已命有司究之。聞彼自國中至鴨綠江。凡衝要所儲軍糧。每驛有一萬二萬石。或七八萬十數萬石。東寧女直皆使人誘之入境。此其意必有深謀。朕觀高麗自古常與中國爭。昔漢唐時。遼皆爲所有。直抵永平之境。恃遠不臣。時時美兵。自古無狀。今遼乏糧。軍士饑困。倘

不卽發沙嶺倉廩賑之。必啟高麗招誘逋逃之心。使高麗出二十萬人以相警。諸軍何以應之。今營繕造作暫宜停止。且今立營屋以居。永樂元年十二月。勅青鎮守遼東孟善曰。朕命爾往鎮東鄙。所宜招懷遠人。靖安邊境。以稱付託之重。爾比遣百戶傅三漢出寨竊馬。以致喪失。內失可用之人。外失信於夷狄。遼地肥腴。一年耕有收。足數年之用。數年有收。海運可省。爾不盡心提督屯種之務。軍士皮裘必先時闕。給庶幾得用。爾及今方以爲言。有司展轉文移。豈決

旬可得。及皮運至。而天氣向暖。苦寒之地。下人何堪。爲帥如此。國亦何賴。十三年十月。塞關外。宴磨峪大峪長小峪小姑將峪大姑將峪勝先峪大水峪小水峪石澗跳梢峪水峪白暴董家小陵峪常峪西石陽北石陽隘口一十六處。每處以軍十一人守之。宣德元年九月。命按問自山海至居庸守關將校。先是。上以邊備不謹。遣右都御史王彰巡視關隘。點閱將士。修築城堡。至是彰還。奏城堡已督士卒修築。而各關指揮千百戶軍士擅離所守之地者五十餘人。

皆當治罪。上曰禦邊所恃有將帥有精兵及城壘堅固。今將卒怠惰如此。設有警急。何以禦之。其指揮千百戶。悉遣人械至。問罪軍士姑宥之。仍命兵部三月一遣御史給事中。點視庶不隳弛。六年十一月。總兵官巫凱上廣寧馬市。所市福餘衛韃官馬牛之數。上謂侍臣曰。朝廷非無馬牛。而與之爲市。蓋以其服用之物。皆賴中國。若絕之。彼必有怨心。皇祖許其互市。亦是懷遠之仁。正統五年五月。瀋陽中屯衛軍有陳其操練不得息。妻孥饑窘者。乞於農時暫放。

耕作以資養贍。俟秋成。赴操。事下行在兵部覆奏。上允之。因著爲令。何意今之軍士不操不耕。困苦更無從控訴矣。六年八月。總兵官曹義言比奉勅旨。以兀察董山爭掌衛印。宜審其所部人情所屬者。授之。臣卽遣人奉宣勅旨。而二人各執一詞。紛紜不定。遂同至開原。臣反覆論以朝廷法制。兀察乃黽勉出其新印。且欲身自入朝陳論。已著令暫還本衛。至秋後赴京。臣竊觀其部落意嚮。頗在董山。而兀察怏怏。終難安靖。永樂中海西野人都指揮。哈塔失叔。

任爭印。太宗皇帝令恟納掌忽魯哈衛塔失掌弗
提衛其人臣各隨所屬。庶消爭釁。以靖邊陲。時遼東
守將屢失機。朝廷以爲憂。乃命王翱往督之。令便
宜行事。翱至。守將以下庭參。翱詰責玩寇失機。故將
斬之。再三哀請。乃已。於是三軍股栗。莫敢不用命。踰
月躬出巡邊。自山海關直抵開原。高墻垣。深溝塹。五
里爲堡。十里爲屯。烽燧斥堠。珠連璧貫。仍簡閱戍卒。
更老弱。賑貧窮。配鰥寡。俾成室家。謂邊境不可以法
律治。凡詞訟。專用贖法。無問輕重量情。以布絹穀粟。

贖罪。雖人命亦令償之。日償命無益。死者之家。而財
或足以濟其用。在遼數年。措置糧數萬石。銀萬餘兩。
馬千餘匹。邊用克足。器械鮮利。軍士飽煖。人樂戰守。
八年四月。錦衣衛指揮吳良奏。臣奉命使海西。見女
直野人家。多中國人。驅使耕作。詢之。有爲擄去者。有
避差操罪犯。逃竄者。久陷胡地。無不懷鄉。爲其關防
嚴密。不得出。或畏罪責。不敢還。情深可憫。今海西各
衛。累受陞賞。皆知感激。請給榜開原及境外。於野人
女直。則諭以理。使無拘禁。於逃叛。則宥其罪。俾之來

歸十四年九月時。車駕北狩。兵部言遼東都御史王翱總兵官曹義。太監亦失哈等。奏報達賊三萬餘人入境。攻破驛堡屯莊八十處。擄去官員軍旗男婦一萬三千二百八十餘口。馬六千餘匹。牛馬二萬隻。盜甲二千餘副。義等失機之罪。雖在赦前。亦難容恕。帝曰。且免其死。翱義俱罰俸半年。七月。兀良哈三衛夷人寇邊。發兵二十萬討之。分爲四軍。成國公朱勇出嘉峯繇中路。左都督馬諒出界嶺繇北路。興安伯徐亨出劉家口繇南路。都督陳懷出古北繇西北。

路踰灤河。渡柳河。經大小興州。過神樹。至全寧。遇福餘。逆戰走之。次虎頭山。遇泰寧朶顏。又擊敗之。御史姚鵬上其功。詔加勇太保。亨進封興安侯。諒封招遠伯。懷平鄉伯。餘進爵有差。景泰二年十一月。建州等衛女直都督李滿住。董山等。自正統十四年以來。乘間竊掠邊境。遼東爲之困敝。都御史王翱等遣指揮王武。經歷佟成。往招之。至是稍歸。所掠男女。而身自入朝。貢馬謝禮。部主事請留董山等。以正典刑。天順二年十一月。永平山海等總兵官沈煜。奏臣所轄

自葦子谷寨。至刀山關。爲關寨者九。馬燉臺者三十。二而松柵谷一關。無水難守。切見葦子谷寨北去關九里。地名洪山口。西止捨身臺。一路山形險峻。少有空缺。請將葦子谷等九關寨軍士外徙於洪山。創設關寨者三。使之併力守禦。可減舊設關寨墩臺三之二事。下兵部從之。三年十一月。都御史李秉奏。同監督太監黃順。總兵官武靖。伯趙輔。其左哨之捷。出撫順。歷打必納等寨俱空。九月廿九日。遇賊於薄刀山。襲於五嶺。柯忠等抵其巢。斬首五十六。生禽二十七。

監丞韋朗等襲於陽家寺。斬首一百二十五。王瑛王銓出渾河。斬首六十四。共收所擄男婦八百餘人。燔其廬舍。其右哨之捷。歷宋產八李等寨。斬首九十七。追於摩天嶺。斬首三十七。裴顯等攻修火等寨。斬首一百三十八。襲於張亦升松林。斬首一百二十有一。共收所擄男婦四百餘人。兵書白圭以聞。上曰。寇旣殄滅。輔等處置得宜。然後班師。十二月。李秉等先奏於益州。復州。廣寧。右屯三衛。各摘戍守。鳳凰山關。隘旣而人情安土。重遷多不樂從。秉等復請於奉集。

通遠各立城堡。摘遼陽招集土兵守之。七年十一月。遼東虜寇哈都赤與父打必納及舅失忒苦犯開原。我軍追之不及。獲鄰寨小郎親屬瓦洪等三人歸。以爲質。小郎等乃擒斬打必納。忒苦又生致哈都赤來贖。守臣還其親屬。械哈都赤至京。命下都察院鞫之。小郎等俱賞布帛。十一年七月。朶顏等衛夷人請開馬市。不許。總兵官歐信等奏三衛至邊。援舊例。乞開廣寧馬市。事下兵部議。此虜爲北虜。滿都魯所驅。雖彼巢穴。潛避近邊。欲求市場。以濟其急。宜令信等

論還故地。上曰。馬市久罷。勿許。果彼爲北虜所迫。暫令於近邊三四百里外屯駐。虜退卽還故地。侍郎馬文升奏。遼東都司帶管應募兵二千七百有奇。廣寧操守應募兵一千八百有奇。俱金復海蓋等衛餘丁。今旣廩食在官。而募者亦授職。然不轄以衛。不籍其姓名。他日勾補之。無從也。乞令管糧叅政稽二處募買量遣。餘丁衆多者。還助舊軍。仍籍應募所留餘丁。分邊隸遼東者以五百人編入撫順。隸廣寧者以一千人增設一所。餘則各照原募之地。編於遼廣諸

衛所乏庶軍有定伍。人無私役。奏可。馬文升奏東山
新添東州馬跟單清河廳場靈陽五堡距遼陽三四
百里。令海蓋餘下轉運。惟艱近堡曠地。每運撥五十
畝。牛價一金。耕守相兼。邊用自給。兵分三路。廣寧爲
中路。開原遼陽爲東路。前屯寧遠錦義爲西路。中有
遼河。虜兵據此。我不能渡。請復浮橋。以聯聲勢。從之。
兵部尚書項忠等議。文升欲於永平府孳牧馬。內選
取牝馬千匹。分給永寧監官軍領養。三歲收其二駒。
死則量加追償。生則預爲調習。遼東軍士缺馬。則具

奏選而給之。宜因其言推而行之。并令陝西山西苑
馬寺各措置牝馬千匹。或二千匹。卽給寺監軍餘領
如例。二年美駒一匹。文升又謂遼東軍士若以馬死
賠補。欲令守臣預籍三路馬軍。月報馬死之數。收軍
所賠。及官助買之價。每季遣官齎價於產馬之處。收
買歲爲常例。文升又以遼東副叅以下多役餘丁。欲
所司稽其丁數。馬軍與二丁。步軍與一丁。其指揮千
百戶等官。合用之數。明立定則。以免餘丁辦納之苦。
其言誠爲良便。戶部議。文升所奏足衣食者。折鈔不

足關之。大半輾爛。歲例布花之給。海運不繼。妻子號寒。登州海船數少。給取每不以時。欲於旅順口。修金復蓋三衛庫三十間。設官吏到。卽散之。所奏均屯田者。謂各衛膏腴爲官所占。乃將累年放免克軍名下。未蠲之租。派分貧丁。而富實餘丁。官豪仍舊私之。無所控訴。詔申飭行。巡撫陳鉞奏。洪武永樂中。軍士二分守城。八分屯田。人丁糧除。景泰以後。乃以餘丁補數抵納。遂爲例。今遼東極邊百需俱出。軍餘又以遺糧負累抵納。寔爲無名。臣近於各處措置。以抵此

數。請悉爲除豁之。戶部議。遼東屯種。景泰時僅一十八萬。是加二萬有餘。此必田以丁授。稅以日增。其間屯軍縱有逃竄。而其田故在。况措置之糧。亦非久計。請移巡按并本部餉郎督同布按糧官。會都司丈量廣寧等二十一衛。見種成熟田畝。仍稽每衛屯軍餘。各種田畝若干。歲納子粒若干。頂補納糧。無田餘丁。幼老若干。衛所官員豪富。軍餘占種。及富實不屯種者若干。以其餘田分發無田軍餘。每名各種一分。輸納子粒。若所徵之數。視舊有餘。然後以無名者具

奏分發。制可。時海西虜酋剝建州三衛入寇。襲陽。巡撫陳鉞議建州夷虜始居斡木河。與七姓野人爲仇。奔依朝鮮不受。因而來貢。朝廷令居遼陽。迤東蘇子河。成化初。倅恩累寇。天威震怒。誅元惡董山等。進師搗其巢穴。當時總兵爲謀不遠。少有克捷。遽爾班師。物論至今惜之。莫若舍經而從權。詭道以制勝。召募土兵。選立驍勇。併力討之。遼人屢經殘掠。含怒切齒。出令募之。必遠近響應。然後聲罪致討。足雪邊恥。詔是之時。太監直權傾中外。旣興大獄。欲立邊

功鉞揣知其意。故屢建征討之議。云總兵官歐信等屢奏建州夷人犯邊。請益征討。有通事王英者。密說汪直曰。建州三衛係祖宗朝設立。衛分世受官賞。修職貢。豈肯背叛。止因近侍郎文升奏准。差行人伴送。禁其買賣。心懷怨望。故爾。且陳鉞不務招安。惟欲貪功啟事。近聞執其報事及投降之人。禁錮凌虐。欲真之死。失遠人心。宜請於上。徃彼撫諭。及體察鉞等所爲。革其情弊。英願備前驅。直喜以聞。上命太監懷恩至閣議。學士萬安等力阻之。曰。直在京城尚

動搖人心如此。若令至邊。陳鉞亦不能保全。誠恐各邊從此聞風。皆憂禍及。無復能盡心防守矣。必欲差官。宜遣大臣。思日然。具以其語復命。上乃勅文升。并通事都指揮詹昇。往都御史陳鉞奏。永樂間遼東馬市三處。其一在開原城南關。以待海西女直。其一在城東五里。其一在廣寧城。皆以待朶顏三衛夷人。正統間。因漏洩邊事。以罷其二。惟開原南關市獨存。近者朶顏屢請開市。朝廷不許。今朶顏窮迫。潛結海西。轉市於我。而海西藉彼馬力。數犯我邊。甚爲非

便。若復許開。則有以收朶顏之心。散海西之黨。而中國并受其利。事下。廷臣會議。報可。五月。錦衣衛指揮吳儼。奏遼東軍士冬衣布花。出自山東民間。每糧一石。折布一匹。歲繇海道。以達遼東。多爲風波。沒漂民。被其害。而軍不沾實惠。乞勅該部議。將十四年以後。每糧一石。收銀四錢。於陸路解送。以給需軍。民俱便。事下戶部議。以爲遼東地無花布。若令折銀。恐後難繼。勅兵部侍郎馬文升。招撫夷寇。先是文升奏。臣借詹昇。招撫建州海西女直。已於四月終。招徠建州

左右二衛掌印都指揮脫羅卜花秃等一百九十五人及被勦家屬指揮郊哈等四十八人繼又招至建州衛掌印都指揮完者秃偕賊首趙得路等廿七人至開原又招海西兀者等衛都督等官察安察等三百七十五人。是日文升又奏虜寇擁衆從清河入境鈔掠因言建州女直叛服不常往年以招降都督董山等而又殺之已爲失信近復搗其巢穴暨殺無辜致彼仇恨變詐難信爲撫爲討伏俟處分子俊等言今推誠撫安事將就緒若欲加兵則仇生於恩何所

示信况六月興師兵法所忌時陳鉞方欲搗巢貪功而文升奏勅招安故鉞違拘不協而文升爲所苦累有奏請也陳鉞奏五月虜入大水峪境我師擊之連勝共斬獲首虜一百四十七級以捷聞章下兵部知之命太監汪直領通事百戶王英往遼東處置邊務初王英謀欲往遼東撫諭諸夷會遣馬文升不得遂至是聞文升等招安功垂成復嗾直而佐之行其意謂建州雖安彘顏三衛宜撫欲因是以爲已功且沮詹昇之進後英得陞千戶而文升之禍肇於此矣七

月剗肥何等衛指揮使等官亦里哈等十七人乞陞
職益實衛指揮同知鎖羅哥禿乞更勅書葛稱哥衛
指揮僉事等官申克捏等三人乞兼給勅書印記諸
夷皆侍郎馬文升等奉勅招徠者弗思等衛指揮等
官都魯禿等十三人乞加陞兀者衛故都指揮同知
等官刺塔子引塔温等一人乞襲職屯阿衛故指揮
使革勤革子馬牛乞陞并請給勅書印記亦麻刺衛
都指揮僉事阿塔乞陞并改衛諸夷皆以招撫至者
巡撫陳鉞復請搗建州巢本兵徐子俊止之馬文升

申誠守關之詬辱科索者失貢夷心請治叅同周俊
罪劉八當哈者東寧人天順間因盜馬奔建州導入
寇乃冒酋名入貢爲親知所識撫臣請梟示之乃
勅卜阿日爾等所遣使中乃有中國叛人冒名希賞
已依法處之矣自後乃須審實十月命太監汪直監
督軍務撫寧侯朱永佩靖虜將軍印克總兵官討建
州夷從陳鉞之請也鉞媚直也本兵余子俊議諸夷
有來朝不犯邊者勿令驚疑直等以其示弱損威乃
誘夷郎禿等四十人貢欲寘之死詔錮之朱永等

襲敗建州夷。奏捷謂賊巢在萬山中。高峻險狹。臣等
分爲五路。出撫順關。半月抵其境。賊據險迎敵。官軍
四面夾攻。且發輕騎焚其巢穴。賊大敗。擒斬六百九
十五級。俘獲四百六十六人。破四百五十餘寨。獲牛
馬千餘。盛甲軍器無算。詔授其奏捷舍人李珍。監
生陳澍。俱爲錦衣衛百戶。珍太監李榮姪澍。陳鉞子
也。御史強珍奏。建州班師之後。虜卽入靉陽。清河四
散。殺掠男婦五百餘民。頭畜無算。實繇前巡撫陳鉞。
啓釁邀功。以致虜報。救恕其指揮王英。白祥都指揮

吳瓚。右叅將崔勝等。俱不能禦。而太監韋朗都督縶
議等。又各畏罪貪功。隱匿前事。法皆逮。兵書余子俊
等。覆奏引。皇明祖訓。叅鉞累犯死罪。不宜再縱。
上命吳瓚。崔勝。戴罪殺賊。韋朗。停歲。賜食米牛羊。縶
謙。陳鉞。各停俸一命。禁邊將誘殺夷人。以爲戰功者。
從。強珍之劾。王全也。九月。命太監汪直。保國公永。朱
威寧。伯兼。左都御史鉞。王住。遼東備邊未行而罷。時
直。怙寵弄兵。蓋永。越輩。以利誘之。因以爲已利。旣濫
爵賞。猶不屬厭。一遇小警。輒欲出師。而三邊屢報烽

燧亦欲希旨以倖功也。此舉雖已罷之。至臘月大同之警。又復行矣。餉司金迪奏遼歲額中豁屯五萬矣。哨守墩卒新塘米七萬矣。乞別爲措置。戶部議以賣鹽銀五萬兩發於屯兵要地支糴。或相兼折與官軍買用。事寧兵止。則准作成化十八年之數。此外自十七年爲始。每歲額外添送銀二萬兩。秋豐穀賤。則送如舊額。弁兩淮及山東運司。見在額辦鹽課。開中一十九萬引。內兩淮成化十五年存積鹽四萬三千引。引米七斗。豆五斗。十年長股鹽九萬二千引。引米五斗。豆三斗。山東成化十五年鹽五萬五千引。引米一斗。豆二斗。召商上納。庶得有濟。疏入從之。然自兵興。費耗糧餉。邊境騷然。所司愈難爲矣。十七年築鳳凰山等城爲朝鮮貢使開之。避建州野略也。山之東至驍陽。築墩臺二十二。山之西爲城。城西六十里。曰斜烈。站站之西六十里。曰新通遠堡。堡之南名寧夷。各增戍守。巡撫王宗彝所創也。十月陳鉞旣因緣晉掌本兵。悔馬市之開釁也。復申嚴其禁例。以自文焉。譚執十九年五月。虜酋亦思馬因爲迤北小王子敗走。

所遺勿穉。朶顏三衛攜往海西。易軍器。道經遼東。巡撫都御史王宗彝等知其詐。以爲市之設。正欲革海西與三衛互市之弊。今若使其得以人口易軍器。而不預爲杜絕。他日必將糾合爲邊患。乃遣譯諭之。凡攜幼稚來市者。倍償其直。至是以所市男女九人來獻。上命分賜司禮監官。餉司毛泰。謹按洪武初。遼東糧料俱從太倉海運。其後罷海運。置屯田。八分屯種。二分戍邏。每軍限田五十畝。租十五石。以指揮千百戶爲田官。都指揮爲總督。歲夏秋二徵。以資官軍。

俸糧。自洪武至永樂。爲田二萬五千三百餘頃。糧七十一萬六千石。有奇。當時邊有儲積之饒。國無運餉之費。誠足食兵之要道也。至於宣德以後。屯田之法。雖日寢廢。軍士猶餘四萬五千四百。而糧亦視舊不減三分之一。近彼邊方多事。屯法盡壞。巡撫官相繼復。其數少增。又歲運銀十萬。兼開中淮浙鹽。所用尚乏。都御史滕昭乃於操練馬軍內。遴選弓馬生疎者三千餘名。退歸屯田。歲省各軍所支糧豆六萬餘石。而得屯糧三萬餘石。至成化十二年。都御史陳鉞仍

以昭所選之軍。勒歸操練。遂罷徵糧。又減除無名屯軍六萬餘名。以五年計之。共減糧三十餘萬石。故今所存正軍。惟一萬六千七百餘名。而歲徵糧止一十六萬七千九百石。又以荒歉蠲免。歲不足七八萬之數。較於舊制屯田之法。十不及一。故遼東三十二倉。迄無兩月之儲。臣愚過計。以爲今日欲足邊用。莫若練選冗兵。使歸屯田。二十年通事楊銘奏。朶顏遣察反等告急。竊意朶顏與小王子素爲仇敵。撫而用之。以夷攻夷之法也。宜遣使撫諭之。兵書余子俊以爲

以夷攻夷。非用兵常法。如唐借回紇以討安慶緒。終唐之世。受其侵軼之患。宜宴察反而罷遣使。廿三年二月。巡撫劉滉等奏。卜蘭罕衛與泰寧衛夷人報小。王子已死。欲從喜降口入貢。因與泰寧同於馬市交易。事下兵部言。卜蘭罕與瓦剌滿都魯和親。不入貢者十餘年。一旦近邊傳報。欲容其爲市。守臣厚加撫恤。諭之曰。馬市之設。朝廷所以待三衛。餘不得同。如欲朝貢。宜仍從大同入。諭泰寧等衛。自後毋得與之俱來。弘治六年。巡按李善奏。臣見遼東邊牆。正統二

年始立。自後三衛夷人假以放牧。潛入河套。間行剽掠。且邊牆阻遼河爲固。瀕河之地。延壘八百餘里。土脉。鹹鹵。秋修春頽。動費巨萬。夏旱水淺。不及馬腹。冬寒水凍。如履平地。所在城堡。畏賊深入。遂將良田數千萬頃。棄而不佃。况道路低窪。每遇水雨。泥濘不通。倘開原有警。則錦義廣寧之兵。不過遙望浩嘆而已。臣詢之故老云。右陸行舊路。自廣寧抵開原。約三百餘里。兼程不二日。可到。地形高阜。土脉滋潤。有古顯州城池遺址。猶存爲今之計。莫若開舊路。展築邊牆。

起廣寧。碁盤山。直抵開原。平頂山。移分守。八百里之。兵聚守。三百里之地。以錦義爲西路。廣寧爲中路。遼陽爲東路。開原爲北路。四路聲勢相接。一路有警。則三路之兵。分投應援。如常山之蛇。首尾相應。如是則暫勞永逸。而九重無東顧之憂。十二年。兵部奏。海西每年一貢。三衛每年再貢。互市相通。世受厚恩。雖時有寇掠。原無聚衆反叛之謀。祇因邊臣。徃徃誘殺。熟虜以爲功。委官覆按。亦不舉正其罪。所以結怨虜人。致啓大釁。彼得以復仇藉口。我軍數敗。且三衛之賊。

易弭而海西之寇難平。失今不圖。恐怨積而導北虜。其患非細。請令巡按御史覆按雙臺之役。人畜殺掠。幾何官軍亦曾敵應與否。分別功罪以聞。自今有誘殺熟虜冒功爲首者。以謀殺漢人律罪之。同行知情者。俱調南方煙瘴守備官。知情者處之。初遼東守臣奏正月中虜衆分道入寇。我軍禦之。連三捷。先後斬首三百級。全勝而歸。議者以爲遼久不振。疑其誘殺。至是朶顏三衛來貢。朝廷遣大通事指揮使楊銘等審之。具云今年三月中。遼東魯大夫差通事誘泰寧

福餘兩衛頭目。脫大乃等男婦三百餘人。到邊互市。盡掩殺之。又領兵出境。燒其羶帳車輛。死者之親。遂屢來復仇。又人自虜中還者云。朶顏三衛遣三百騎。與北虜脫羅干等約和。謀入寇。給事戴饒參駁其事。命都御史顧佐往按覈。以聞。久不決。而指揮崔鑑等流言於長安。謂佐偏刑激變。佐請別遣。上不允。會總兵李杲虛言虜至。請增兵。臺省交劾。十三年。顧佐乃勘報。曰。太監任良總兵李杲。巡撫張玉。誘殺之罪。得旨代回。初海西兀者前衛都督都理吉次子尚

古以舍人入貢授指揮。後貢駱駝并歸被虜人口。求
陞都督不許。尚古怒云：絕貢時入寇，遮絕海西諸胡
之入貢者，胡怨之。尚古後悔過邛邊歸款，守臣貪功
招之，約爲求陞。尚古遂率五百騎入至開原，守臣驗
五十人赴京，泰寧衛都督猛革忒木兒聞之大怒，邊
將謂尚古阻其好音，反容先納，遂入寇遼陽。旣去，仍
留書於邊，言諸胡所以侵犯者，實出於此。建州左右
衛亦各遣人來，尚古若誅，則衆怨俱解。守臣因請誅
尚古，或投之南荒以謝諸胡。兵部議爲尚古初使人

至邊，意在服罪，以釋諸胡之忿。當時守臣止應曉諭
令回，不應擅招以挑胡忿。今尚古旣貢，又不可誅。若
如所請，恐結海西諸衛，更生他患。守臣不善爲謀，一
至如此，給事中屈伸等言：泰寧諸虜內附日久，受恩
最深，一旦以尚古爲辭，大肆寇掠，殺虜軍民，攻陷屯
堡。今日問罪之師，當舉無疑。兵部稱若將所虜漢人
送回，俟有重賞，臣等以爲漢人係泰寧諸胡親行虜
獲者，設若送回行賞，是前日之犯邊，不以爲罪。今日
之歸俘，反以爲功，誨以爲盜之利，啓其無賴之心。王